

Rávvagat doavttirgrádstudentii

Dohkkehuvvon Sámegeiela ja sámi girjjálašvuoda
doavttirgrádaprogámma stivrras 14.2.2023

Sisdoallu

1.	Láidehus.....	4
2.	Stipendiáhta virgádeapmi	5
3.	Ohcan doavttirgrádaprográmmii ja sisaváldin	6
4.	Doavttirgrádašiehtadus ja bagadalli nammadeapmi	7
5.	Bagadalli lonuheapmi	8
6.	Stipendiáhta geatnegahtton barggut	9
7.	Kurssaid sisaheiveheapmi doavttirgrádaprográmmii.....	10
8.	Prošeaktačilgehusa ođasteapmi.....	11
9.	Stipendiáhthašiehtadusáigodaga guhkideapmi	12
10.	Stipendiáhthaid jahkásaš raporteren	13
11.	Bagadalliid jahkásaš raporteren	14
12.	Oahppooasi dohkkeheapmi	15
13.	Oktasaš grádat ja cotutelle-šiehtadusat.....	16
14.	Nákkosgirjii loahpalaš gárvvisteapmi ovdal go dat ohccojuvvo árvvoštallamii.....	17
15.	Ohcan nákkosgirjii árvvoštallankomitea árvvoštallamii	18
15.1.	Sisaaddin árvvoštallamii: Ohcamuš ja mildosat	18
15.2.	Árvvoštallankomitea nammadeapmi	18
15.3.	Árvvoštallankomitea cealkámuš.....	19
15.3.1.	<i>Komitea cealkámuš: Nákkosgirji dohkkehuvvo</i>	20
15.3.2.	<i>Komitea ávžžuha dievasmahttit nákkosgirjii ovdal loahpalaš cealkámuša</i>	20
15.3.3.	<i>Komitea cealkámuš: Nákkosgirji ii dohkkehuvvo</i>	21
15.4.	Árvvoštallankomitea ovttamielalaš dahje juohkásan cealkámuš.....	21
15.4.1.	<i>Ovttamielalaš cealkámuš</i>	21
15.4.2.	<i>Juohkásan cealkámuša guorahallan</i>	22
15.5.	Geahččaladdanlogaldallama ja nákkáhallama áiggit sohppojuvvojit	22
16.	Nákkosgirji dohkkehuvvo almmuheapmái	23
16.1.	Erratalistu: maŋimuš meattáhusaid divvun ovdal go nákkosgirji almmuhuvvo	23
16.2.	Nákkosgirjii deaddileapmi.....	23
16.3.	Nákkosgirjii almmuheapmi girjin ja digitála hámis Bibsys Brages	24
17.	Nákkáhallandilálašvuhtii ráhkkanepmi	26
17.1.	Geahččaladdanlogaldallan	26
17.2.	Nákkáhallan	26
18.	Eará geavatlaš dieđut	28

18.1.	Preassadieđáhus ovdal nákkáhallandilálašvuoda.....	28
18.2.	Nákkáhallanbeaivvi lunša, gáfestallan ja doavttirdoalut dahje -mállásat.....	28
18.3.	Nákkáhallamii gullevaš goluid eretgeassin vearroddieđáhusas.....	28

1. Láidehus

Rávagihppagis leat dieđut maid doavttirgrádakandidáhta dárbbáša iežas doavttirgrádaoahpu áigodagas. Gihppaga vuođđun lea universitehtaid ja allaskuvllaid láhka, nationála kvalifikašuvdnarámmavuogádat alit ohppui ja čuovvovaš dokumeanttat:

- [Sámi allaskuvlla filosofii ja doavttirgráda láhkaásahus](#) (dás duohko teavsttas: láhkaásahus)
- [Njuolggadusat doavttirgráda \(PhD\) prográmmii sámegeelas ja sámegeela girjjálašvuoda Sámi allaskuvllas](#) (dohkkehuvvon 2013:s)
- [Sámegeela ja sámi girjjálašvuoda doavttirgrádaprográmma stivra](#)
- [Oahppodoaimmaid kvalitehtagiehtagirjji doavttirgrádaprográmmakapihtal](#)

Rávagihpa ii govčča buot vejolaš beliid, áššiid dahje prosedyraid maid doavttirgrádakandidáhta/stipendiáhhta sáhtta dárbbášit doavttirgrádaprográmma áigodagas. Sámi allaskuvlla oahpuid hálldašeamis leat oppalaš njuolggadusat, prosedyrat ja rutiinnat mat ledje juo sajis go ásahus bijai johtui doavttirgrádaprográmma 2016:s, ja dat gustojit maiddái doavttirgrádoahppui muhto eai čilgejuvvo dán gihppagis sierra.

Ávžžuhuvvo ahte buot studeanttat Sámi allaskuvllas oahpásnuvvet dáidda:

- [Sámi allaskuvlla kvalitehtasihkkarastinvuogádaga oppalaš oassi](#)
- [Váiddaáššiid rutiinnat](#)

2. Stipendiáhta virgádeapmi

Ohcci oažžu bargiidossodagas virgefálaldaga go Sámi allaskuvlla fágavirggiid virgáibidjanorgána (FVO) lea mearridan fállat stipendiáhttavirggi ohccái. Vuolláičállin ja sisafievrrideapmi dáhpáhuvvá allaskuvlla rutiinna [vuodul](#).

Stipendiáhta vuosttaš guovtti bargovahkkui bargiidossodat ráhkkanahhtá ja hábme oahpásmuvvanplána. Oahpásmuvvanplánas stipendiáhtta oahpásmuvvá iešguđet ossodagaide muhto maiddái iežas rivttiide ja geatnegasvuodáide Sámi allaskuvlla bargin.

Dábálaččat vurdojuvvo ahte stipendiáhtta lea álggus Diehtosiiddas, vai oahpásnuvvá kollegaide ja bargobirrasii bures. Lea erenoamážit dehálaš ahte stipendiáhtta beassá oahpásnuvvat fágabirrasii, ja goahtejođiheaddjis lea ovddasvástádus láchit dili dákkár oahpásnuvvamii.

Doavttirgrádstipendiáhtaid njuolggadusaid virgáibidjankapihttalis boahhtá ovdan ahte virgádeapmi eaktuda ahte stipendiáhtta beassá doavttirgrádaprográmmii, ja jus ii válđojuvvo sisa ovttage doavttirgrádaprográmmii golmma mánu áigodagas, de virgádeapmi loahpahuvvo:

Eaktun doavttirgrádstipendiáhttavirgái álgimii lea ahte ohcci válđojuvvo sisa doavttirgrádaprográmmii. Dutkanoahpu loahpalaš plána galgá dieđalaš virggiid virgáibidjaneavttuid lánkaásahusa § 1-3 (8) mielde leat dohkkehuvvon ja šiehttojuvvon maŋemusat golbma mánu maŋŋel go virgái lea álgán. Plána galgá čilget mo dutkanáigodaga bargoáigi lea juhkkujuvvon dutkanohppui ja geatnegahttojuvvon bargui. Plána galgá maiddái namuhit ovddasvástideaddji akademalaš bagadalli ja čilget makkár bagadallan vurdojuvvo ja jurddašuvvo.

Doavttirgrádstipendiáhtta ii sáhte sirdit eará doavttirgrádaprográmmii šiehtakeahhtá bargoadiin.

3. Ohcan doavttirgrádaprográmmii ja sisaváldin

Virgáduvvon stipendiáhtta ohcá doavttirgrádaprográmmii virgádeami maŋŋil, muhto áinnas ovdal go álgá virgái. Áigemearri beassat doavttergrádaprográmmii lea golbma mánu maŋŋel virgádeami.

Ohccit ávžžuhuvvojit ohcat beassat doavttirgrádaprográmmii elektrovnnalaš vuogádaga bokte. Ohcama sáhttá maid sáddet boastta mielde Sámi allaskuvlii dahje sihkkaris e-boastta bokte čujuhussii postmottak@samas.no.

Ohcci galgá sáddet dahje laktit elektrovnnalaš ohcanvuogádahkii čuoovovaš dokumeanttaid (gč. láhkaásahusa § 5-1 ja ohcanskovi):

1. Sierra ásahuvvon ohcanskovi.
2. Čađahuvvon master-/váldofága-/ámmáteksámena dahje vástideaddji duođaštus (-aid).
3. Duođaštusa/árvosátne duođaštusa čađahuvvon vuolit grádas.
4. Eará vejolaš skuvllaid/oahpuid duođaštusa/árvosátne duođaštusa.
5. Prošeaktačilgehusa (5-10 siiddu), geahča doavttirgrádaoahpu prográmmaplána 3. oasi.
6. Stipendiáhttavirgádeami fágalaš árvoštallanlávdegotti cealkámuša.
7. Olgoriikkas čađahuvvon oahput: árvoštallamat oahpuin mat huksejit sisaváldingealbbu (váldde oktavuoda oahppohálddahasain juos dakkár árvoštallan váilu).
8. Vejolaš duođaštusat čađahuvvon eksámeniin/kurssain, jus ohcá dohkkehuvvot oahpu ja/dahje doavttirgurssa oassin.
9. Juos nákkosgirji čállojuvvo eará gillii go sámegillii, de dan ferte ákkastallat (vrd. prográmmaplána).
10. Eará vejolaš mildosat.

Oahppohálddahasu áššemeannudeaddji meannuda sisaváldinášši prográmmastivrii mii mearrida sisaváldima. Go kándidáhta lea váldon sisa doavttirgrádaprográmmii de álggahuvvo doavttergrádašiehtadus bargu mainna sisaváldin proseassa loahpahuvo.

4. Doavttirgrádašiehtadus ja bagadalli nammadeapmi

Go kandidáhtta lea beassan sisa prográmmii, de formaliserejuvvo doavttirgrádaprogrammašiehtadus mas rievttit ja gáibadusat regulerejuvvojit šiehtadusáigodagas. Šiehtadusas šihthtojuvvo earret eará gii lea stipendiáhta váldobagadalli, ja vejolaččat mielbagadalli. Stipendiáhtat geat fágalaččat gullet eará ásahusaide atnet guoskevaš ásahusa doavttirgrádašiehtadusmála. Stipendiáhtat geat čuvvot Sámi allaskuvlla doavttirgrádaprogramma atnet doavttirgrádašiehtadusmála mii lea ruovttusiiddus.

Doavttirgrádašiehtadusas leat guokte oasi: A-oassi ja B-oassi. Doavttirgrádakandidáhttat geat eai leat virgáduvvon Sámi allaskuvllas galget čállit šiehtadusa mas lea golbma oasi: A-oassi, B-oassi ja C-oassi.

A-oassi: Oppalaš oassi man buohkat geat leat váldon sisa doavttirgrádaprogrammii galget deavdit. Šiehtadusa oassebealit lea kandidáhta ja goahti.

B-oassi: Šiehtadus doavttirgrádaohpu fágalaš bagadallama hárrái galget buot kandidáhttat geat leat beassan sisa doavttirgrádaprogrammii čállit. Buot nammaduvvon bagadallit galget vuolláičállit dán oassái.

C-oassi: Šiehtadus gaskal ekstearna ásahusa ja Sámi allaskuvlla doavttirgrádaohpu čađaheami birra čállojuvvo dušše kandidáhtaide geain lea bargobáiki eará ásahusas.

Stipendiáhtta galgá ieš háhkat bagadallis ja earáin vuolláičállosiid iežas doavttirgrádašiehtadussii, ja máhcaha dan dutkanhálddussii. Doavttirgrádašiehtadusa gávnnat siiddus <https://samas.no/se/a/dutkan/doavttirgradaprogramma>, ja sádde sisabeassanohcama doavttirgrádaprogrammii. Oahppo- ja dutkanhálddahus neavvu dárbbu mielde.

Stipendiáhtta viežžá doavttirgrádašiehtadusmála [intraneahtas](#) ja deavdá dasa dieđuid mat gullet prošehtii.

Stipendiáhtta čállá vuollái A-šiehtadusa § 13 ja B-šiehtadusa § 9. Jus stipendiáhtta dárbbáša veahki šiehtadusa deavdimá oktavuodas, de oážžu veahki dutkanhálddahusas.

Stipendiáhtta sáhtta árvalit alcces bagadalli. Dakkár árvalusaid ovddida programmajodíheaddjái. Goahtejodíheaddji ja programmajodíheaddji árvoštallaba álggus váldobagadalli siskkáldas fágaresurssaid gaskkas. Mielbagadalli (-t) sáhtta leat juogo siskkáldas dahje olggobeali fágaresurssat. Go lea čielgan geat galggaše bagadallit, de goahtejodíheaddji gulahallá bagadalliiguin ja nammada sin doibmii doavttirgrádašiehtadusa ja bálkášiehtadusa vuolláičállimiin. Stipendiáhtta koordinere šiehtadusa vuolláičállima ja háhká ieš vuolláičállosiid bagadalliin.

Jus stipendiáhtas galgá leat bargosadji eará ásahusas, de galgá maid C-šiehtadus čállot mas čielggaduvvojit eavttut dan hárrái.

Go stipendiáhtta, bagadalli (-t) ja goahtejodíheaddji leat vuolláičállán doavttirgrádašiehtadusa, de dutkanhálddahus ovddida šiehtadusa doavttirgrádaprogrammastivrrajodíheaddjái, guhte vuolláičállá go kandidáhta lea váldojuvvon sisa prográmmii.

5. Bagadalli lonuheapmi

Jus kandidáhtta dahje bagadalli mielas nubbi oasálaš ii deavdde geatnegasvuođaidis bagadallanšiehtadusa §§ 4 ja 5 mielde, de galgá oasálaš, guhte oaivvilda ahte geatnegasvuođat rihkkojuvvojit, váldit ášši ovdan nuppiin oasálaččain dahje goahtejođiheddjiin guhte galgá geahččalit veahkehit čoavdit ášši.

Filosofijja doavttirgráda láhkaásahusas (§ 7-2) čuožžu ná:

Sihke doavttirgrádakandidáhtta ja bagadalli sáhtta dáhtut goađi nammadit kandidáhttii ođđa bagadalli. Bagadalli ii sáhte geassádit ovdal go ođđa bagadalli lea nammaduvvon. Sierramielalašvuođaid, mat gusket bagadalli ja kandidáhta fágalaš vuoigatvuođaide ja geatnegasvuođaide, sáhtta sihke bagadalli ja kandidáhtta buktit DOS guorahallamii ja mearrideapmái.

Jus lea dárbu lonuhit bagadalli ja buot bealálaččat leat ovttaoavvilis bagadalli lonuheapmái de goahtejođiheaddji sáhtta mearridit lonuhit bagadalli.

Jus eaba ságaškuššamiid maŋŋá boađe ovtaide das mo čoavdit dili, de sáhtta kandidáhtta dahje bagadalli bivdit bagadallanšiehtadusa (B-oasi) cealkit eret.

Eretcealkinbivdda galgá ovddiduvvot goahtejođiheaddjái. Oasálaš, guhte álggaha ášši, galgá sáddet kopijja nuppi oasálažžii. Goahtejođiheaddji čuoovola ášši ja jus mearriduvvo lonuhit bagadalli de oačču kandidáhtta ođastuvvon doavttergrádašiehtadusa.

6. Stipendiáhhta geatnegahtton barggut

Stipendiáhhta virgáduvvo dábálaččat njealji jahkái. Nákkosgirjji čállinbargu, nu gohčoduvvon dutkanoassi, vástida 150 oahppočuoggái dahje oktiibuot 2,5 jahkái. Oahppooassi ges vástida 30 oahppočuoggái, ½ jahkái, mas kandidáhhta čađaha njeallje kurssa, nu go prográmmaplánas čilgejuvvo. Stipendiáhhta guhte lea virgáduvvon njealji jagi áigodahkii galgá ovtta jagi, dahje 25 proseantta bargoáiggistis, doaimmahit nu gohčoduvvon “geatnegahttojuvvon bargguid”, maid goahteráđđeaddi pláne ovttas doavttirgrádstipendiáhtain. Dát lea regulerejuvvon Sámi allaskuvlla doavttirgrádstipendiáhtaid njuolggadusaid § 5, mas čuožžu:

Plána goas ja maid doavttirgrádstipendiáhhta galgá bargat geatnegahttojuvvon bargguid, galgá mearriduvvot maŋimustá golbma mánu maŋnel go lea álgán virgái. Lea lagamus hoavdda ovddasvástádus ahte plána ráhkaduvo.

Geatnegahttojuvvon barggut eai galgga báhcit virgáibidjanáigodaga loahppageahčái. Maŋemus guhtta (6) mánu galget várrejuvot aivvefal doavttirgrádbargui.

Plána mii stipendiáhhtaáigodaga vuosttaš golmma mánu siste ráhkaduvo doalahuvvo nu guhkás go vejolaš ja sáhtta rievdaduvvot dušše buriin ákkaiguin, ovdamearkka dihte jus oahppu sirdojuvvo eará áigodahkii.

Geatnegahttojuvvon bargguid plána vurkejuvvo stipendiáhhta dutkanmáhppii.

7. Kurssaid siseiveheapmi doavttirgrádaprográmmii

Kandidáhta sáhtta ohcat ovdal čađahuvvon oahpu siseivehuvvot maŋnel go lea ožžon ja váldán vuostá oahpposaji. Jus áigu čađahit kurssa eará ásahas maŋnel go lea váldon sise doavttirgrádaohppui, de galgá ohcat kurssaid dohkkehuvvot iežas doavttirgrádaprográmma ohppui. Ohcamuš sáddejuvvo oahppohálddahussii. Loahpalaš dohkkeheapmi dahkko maŋnel go kandidáhta lea čađahan kurssa, ja go lea buktán oahppoduođastusa Sámi allaskuvlii.

Siseivehanohcamat ovddiduvvojit oahppohálddahussii ohcanskoviin dahje Studentwebba bokte. Dábálaččat lea oahpporáđdeaddi áššemeannudeaddji siseivehanáššiin. Áššit meannuduvvojit *universitehta- ja allaskuvlálaga § 3-5 vuosttaš lađđasa* mielde. Doavttirgráda prográmmastivra dahká mearrádusa siseivehanáššiin.

Eanet dieđut leat lánkaásahas *Forskrift om godkjenning og fritak fra høyere utdanning* ja *Sámi allaskuvlla filosofija doavttirgráda lánkaásahusa § 8-1*, gos čuožžu e.e: “Oahppooassi galgá sisttisdoallat fáttáid, mat dahket unnimustá 30 oahppočuoggá ja main unnimustá 20 oahppočuoggá čađahuvvojit sisaváldima maŋná. Fáttát mat gullet oahppooassái, eai berre leat boarrásabbot go guokte jagi dalle go kandidáhta váldojuvvo sise prográmmii.”

8. Prošeaktačilgehusa ođasteapmi

Doavttirgrádaprográmma lálkaásahusa § 5-1 cealká ná:

Kandidáhtta ja váldobagadalli galgaba jođánepmosit ja unnimustá golmma mánu sisa sisaváldima maŋŋá guorahallat prošeaktačilgehusa ja árvvoštallat leago dárbu muddet dan.

Jus kandidáhtta ja váldobagadalli šiehtaba muddet prošeaktačilgehusa, de kandidáhtta doaimmaha ođastuvvon prošeaktačilgehusa dutkanhálddahussii, guhte vurke ođđa prošeaktačilgehusa kandidáhta dutkanmáhppii.

9. Stipendiáhhttašiehtadusáigodaga guhkideapmi

Nu go phd-láhkaásahusa § 5-3 nuppi oasis čuožžu, de sáhhtá šiehtadusáigodat guhkiduvvot: “Šiehtadusáigodat sáhhtá guhkiduvvot bargi vuoigatvuođaid vuodul, dahje dat galgá čielggaduvvot erenoamážit oahpu ruhtadeami oktavuodas.”

Guhkideamit mat dahkkojit láhkavuđot permišuvnna geažil meannuduvvojit hálldahuslaččat.

1. Bargiidossodat oažžu dieđu NAV:s ahte stipendiáhhtta lea permišuvnnas.
2. Bargiidossodat rehkenastá ođđa loahpahandáhtona stipendiáhhtii ja sádde ođđa bargošiehtadusa stipendiáhhtii.
3. Stipendiáhhtta čállá vuollái bargošiehtadusa ja máhcaha dan bargiidossodahkii.
4. Stipendiáhhtta sádde dieđu iežas bagadallái (-iide) ahte stipendiáhhttaáigodat lea mañiduvvon.
5. Dutkanhálddahus sádde formálalaš dieđu bagadallái ahte bagadallanáigodat lea mañiduvvon.

Jus kandidahta ohcá bargoáigodaga guhkideami (vai oažžu eanet bargodiimmuid) dahje virgelobi (vai beassá botket iežas stipendiáhhttaáigodaga omd. eará bargguid doaimmaheami dihte) de meannuduvvo ohcamuš FVO:s, gos mearrádus váldo stipendiáhhttaáigodaga guhkideami birra.

1. Stipendiáhhtta sádde ohcamuša bargiidossodahkii. Ohcamušaide mat gusket láhkaásahusa § 2-3 (6) gáibiduvvo árvvoštallan bagadallis (-in) man olu stipendiáhhtta lea mañjonan
2. Bargiidossodat válmmaštallá ja lokte ášši FVO:s
3. Bargiidossodat vástida ohccái FVO mearrádusain. Jus oahpporievtti guhkideapmi galgá meannuduvvot, de addo diehtu ohccái ahte oahpporievtti guhkideapmi meannuduvvo sierra.
4. Jus guhkideapmái biddjojot eavttut maid bagadalli (-t) ferte árvvoštallat ovdal guhkideapmi lea gustovaš, de bargiidossodat váldá váldobagadalliin oktavuodá.
5. Stipendiáhhtta dieđiha iežas bagadallái (-iide) jus stipendiáhhttaáigodaga loahpahandáhton rievdá.
6. Bargiidossodat sádde dieđu oahppo- ja dutkanhálddahussii stipendiáhhttaáigodaga rievdamana birra.
7. Oahppohálddahus meannuda oahpporievtti guhkideami ja sádde mearrádusa studentii. Jus oahpporiekti guhkiduvvo, dat registrerejuvvo FS:i. Jus ii guhkiduvvo, de addo studentii diehtu dan váikkuhusaid birra. Dieđut vurkejuvvojit kandidahtamáhppii.
8. Dutkanhálddahus sádde formálalaš dieđu bagadallái dieđu goassážiin bagadallanáigodat lea jotkojuvvon.

10. Stipendiáhtaid jahkásaš raporterren

Sámi allaskuvla čuovvulahtta buot ásahusa stipendiáhtaid fágalaš ovdáneami. [Intraneahtas](#) lea raporterenskovvi, mainna buot stipendiáhtat jahkásaččat galget raporteret proševtta ovdáneami.

1. Stipendiáhtta oažžu miessemánu 20. beaivvi juohke jagi muittuhusa raporterema birra.
2. Stipendiáhtta raportere skovis proševtta ovdáneami vássán oahppo- ja máhcaha skovi dutkanhálddahussii maŋemusat geassemánu 10. beaivvi.
3. Dutkanhálddahus geahčada raporttaid ja bivdá stipendiáhta dievasmahttit deavdima jus leat váilevašvuodát raporttas.
4. Dutkanráđđeaddi vurke skovi stipendiáhta dutkanmáhppii ja váruha ahte biddjo ii almmolaš dokumeantan.
5. Go ovdáneraporttat meannuduvvojit doavttirgrádaprográmmastivrras ja DOS:s, de sáhtta mearriduvvot ahte stipendiáhtat galget čuovvuluvvot iešguđet vugiin:
 - 1) UNNIT ČUOVVULANMEARRÁDUSAT. Doavttirgrádaprográmmastivra sáhtta ovdáneraporttaid vuodul árvalit čovdosiid vejolaš hástalusaid mat raporttain bohtet ovdan. Unnit čuovvuleamit leat omd. árvalit ahte goahti fállá stipendiáhttii resurssaid liigebagadallamii. Oahppo- ja dutkanhoavda čuovvula ášši ovtta goahtejodiheddjiin.
 - 2) STUORIT ČUOVVULANMEARRÁDUSAT. Ovdáneraporttain – dahje vejolaččat váilevaš raporteremiin – sáhttet bohtit ovdan stuorit hástalusat, mat gáibidit vuđoleabbo ráhkkaneami. Doavttirgrádaprográmmastivra ja DOS sáhtta dákkár áššiin dingot eanet dieđuid ja sierra meannudeami eará čoaččim. Váilevaš ovdáneapmi sáhtta ovdamearkka dihte mielddisbuktit ahte bálká bissehuvvo ja stipendiáhtta eretcelkojuvvo virggis.

11. Bagadalliid jahkásaš raportereren

Sámi allaskuvla čuoovvulahtta dárkilit fágalaččat ja hálddahaslaččat prošeavttaid mat leat Sámi allaskuvlla iežas doavttirgrádaprográmmas ja gáibida váldobagadallis raporterema phd-prošeavttaid fágalaš ovdáneami ektui.

1. Dutkanráđđeaddi sádde miessemánu 20. beaivvi juohke jagi jahkásaš muittuhusa raporterema birra Sámi allaskuvlla doavttirgrádaprográmma váldobagadalliide.
2. Váldobagadalli máhcaha devdon skovi dutkanráđđeaddái maŋemusat geassemánu 10. beaivvi.
3. Dutkanráđđeaddi geahčada raportta ja bivdá bagadalli dievasmahttit skovi jus leat váilevašvuodát.
4. Dutkanráđđeaddi vurke skovi stipendiáhta dutkanmáhppii ii almmolaš dokumeantan.
5. GDS-goahtejođiheaddji lokte bagadalliid raporttaid doavttirgrádaprográmmastivrii ja Dutkan- ja oahppostivrii seammá áššis mas lokte doavttirgrádakandidáhtaid raporttaid.

Váldobagadalliid ovdánanraporttaid dieđuid (dahje váilevaš dieđuid) vuodul sáhtta doavttirgrádaprográmmastivra dahje dutkan- ja oahppostivra váldit mearrádusa čuoovvut ovdánanraporttaid iešguđet vugiin (vrd. kapihttaliin 10 “Stipendiáhtaid jahkásaš raportereren” badjelis).

12. Oahppoasi dohkkeheapmi

Go kandidáhta ohcá doavttirgrádadutkosa árvvoštallamii, de galgá mielddusin biddjot duođaštus ahte su oahppoassi lea dohkkehuvvon.

1. Kandidáhta ohcá dohkkeheami nu jođánit go lea čađahan oahppoasi, ja maŋemusat guđa mánu ovdal go áigu ohcat doavttirgrádadutkosa árvvoštallamii. Ohcan sáddejuvvo oahppohálddahussii, ja ohcamis galgá boahtit ovdan maid son ohcá dohkkehuvvot oahppoassin. Jus kandidáhta áigu sisaheivehit eará ásahusaid oahpuid, de leat eanet dieđut čihččet kapihttalis badjelis.
2. Áššemeannudeaddji iská lea go kandidáhta deavdán oahppoasi gáibádusaid mat bohtet ovdan lálkaásahusas (gč § 8-1) ja prográmmaplánas, ja ahte oahppoasi elemeanttat eai leat nu áigahaččat ahte eai sáhte dohkkehuvvot.
3. DOS fápmudusjuolludemiin lea dutkan- ja oahppohoavddas váldi meannudit ja mearridit earjil áššiid mat gusket studeanttaide, go sullasaš ášši lea ovdal meannuduvvon dahje ášši lea čielggas áššáiguoskevaš njuolggadusaid ja lágaid ektui. Jus áššis leat eahpečielggasvuodát de ovddiduvvo DOS:i.
4. Áššemeannudeaddji čállá duođaštusreivve mas boahotá ovdan ahte dohkkeheapmi gusto nu guhká go kandidahttas lea oahpporiekti, ja jus ii geige doavttirgrádadutkosa oahpporievtti áigodaga siskkobeale, das sáhttet leat váikkuhusat oahppoasi dohkkeheapmái.
5. Jus oahppoasis leat elemeanttat mat eai sáhte dohkkehuvvot omd. danin go leat beare áigahaččat dahje eará ládje eai deavdde gáibádusaid, de ferte kandidahta eará kurssaid dahje elemeanttaid čađahit mat sáhttet dohkkehuvvot. Kandidahta sáhtta geiget doavttirgrádadutkosa, muhto dat ii árvvoštallojuvvo ovdal go oahppoassi lea dohkkehuvvon, gč kap. 15.

13. Oktasaš grádat ja cotutelle-šiehtadusat

Sámi allaskuvla sáhttá ovttasbarggu álggahit eará ásahusaiguin, nu go čilgejuvvo láhkaásahusa 25. kapihttalis: “Oktasaš grádat ja cotutelle-šiehtadusat”. Paragráfas 25-2 čuožžu ahte “[o]ktasaš grádat doibmet dábálaččat dalle go institušovnnat leat ovddalgihtii ásahan fágalaš ja bistevaš ovttasbargoortnegiid”.

Jus kandidáhtta ja váldobagadalli guovttos oaidniba dárbbu ráhkadit šiehtadusa, de sáhttá doavttirgrádaprošeavtta váldobagadalli goahtái evttohit álggahit dakkár ovttasbarggu. Nanu fágalaš ákkat ja árvvoštallamat fertejit leat vuodđun ovttasbargui. Dasalassin ferte leat áigumuš ásahit guhkitáigge fágalaš ovttasbargu ásahusaid gaskka. Ovdal go oktasaš grádat ja cotutelle-ovttasbarggut biddjojit johtui, de Sámi allaskuvla berre árvvoštallat leatgo dárbbášlaš fágalaš ja hálddahuslaš resurssat čuovvolit dakkár ovttasbarggu.

Lea dábálaččat dutkanhálddahus guhte bargá cotutelle-šiehtadusaiguin ja gulahallá olgoriikka ásahusain oažžun dihte áigái cotutelle-šiehtadusa.

14. Nákkosgirjji loahpalaš gárvvisteapmi ovdal go dat ohccojuvvo árvvoštallamii

Nákkosgirjji giehtačálus (mánus) galgá leat áibbas gárvis ja loahpalaš hámis ovdal go studeanta sádde ohcamuša árvvoštallamii. Láhkaásahusa § 19-2 mielde nákkosgirji almmuhuvvo dan hámis go dat lea addojuvvon árvvoštallamii. Dan dihte nákkosgirjji giehtačállosa loahpalaš gielalaš dárkkisteapmi (ng. giellabassan), čoahkkáigeasuid gielaid ja dutkamuša formála beliid dárkkisteapmi ferte maddái dáhpáhuvvat ovdal go studeanta sádde nákkosgirjji sisa árvvoštallamii iige dakkár divvumiid sáhte bargat árvvoštallankomitea barggu mannel. Danin dát oppalaš gielalaš dárkkisteapmi lea eará go erratalisttu ráhkadeapmi (gč. kapihttala 4.1. mas erratalistu čilgejuvvo dárkileappot).

Maddái nákkosgirjji govat, govvosat, tabeallat, kárttat ja eará dákkár oasis fertejit maddái leat loahpalaš hámis daningo daidige ii sáhte šat rievdadit árvvoštallankomitea cealkámuša mannel muhto dat almmuhuvvojit dan hámis go dat leat addojuvvon árvvoštallamii. Dákkár materiálad loahpalaš deaddilanhámiid lea maddái buoremus ordnet juo nákkosgirjji gárvvistanproseassa áigge vai dát beallige ii báze loahppamuttu deaddilanproseassa bargun.

Nákkosgirji ii sáhte sisttisoallat materiála mii rihkku jávohisvuodašiehtadusaid, persovdnasuodjaleami dahje vuoignaduodješiehtadusaid. Danin go nákkosgirji almmuhuvvo sihke digitála hámis Bibsys Brages ja dat deaddiluvvo girjin, de ferte studeanta viežžat lobiid beassat atnit dutkamušastis ovdamearkka dihte govaid, illustrašuvnnaid, kárttaid dahje eará materiálad maid vuoigatvuođaid earát eaiggáduššet. Girjji kolofonsiiddus namuhuvvojit lobit mat nákkosgirjji čállis leat. Nákkosgirjji govvateavsttain namuhuvvojit govvideaddjiid namat ja govvenjagit ja maddái gáldut gos govus, kárta ded. lea vižžojuvvon. Buot lobit galget leat čielgasat ovdal go studeanta ohcá nákkosgirjji árvvoštallamii (gč kap 3.1 vuollelis ja árvvoštallanohcanskovi).

Artihkalvuđot nákkosgirjiide dárbbášuvvojit vejolaš mielčálliid dohkkeheamit (gč. láhkaásahusa § 11- 1 ja dán rávagihppaga kapihttala 3.1).

Nákkosgirji sáhtta almmuhuvvot digitála hámis Bibsys Brages easka go árvvoštallankomitea lea dan dohkkehan almmuheapmái.

15. Ohcan nákkosgirjji árvvoštallankomitea árvvoštallamii

15.1. Sisaaddin árvvoštallamii: Ohcamuš ja mildosat

Nákkosgirjji árvvoštallano hcan lea čilgejuvvon láhkaásahusa § 14-1. Sámi allaskuvlla oahppohálddahuš váldá vuostá nákkosgirjji árvvoštallano hcamušaid miehtá jagi. Kandidáhtta mearrida ieš goas addá nákkosgirjji árvvoštallamii. Váldobagadalli ovddasvástádussan lea dieđihit Sámi allaskuvllii (prográmmastivrra jođiheaddjái) áiggil – áinnas manjimustá 2 mánu ovdal go nákkosgirjji plánejuvvon o hcat árvvoštallamii – goas kandidáhtta addá sisa nákkosgirjjiis, vai ása hus álggaha nákkosgirjji árvvoštallamii gullevaš ráhkkananproseassa (gč. láhkaásahusa § 13-2 nuppi oasi).

Nákkosgirjji addojuvvon sisa oktan ohcamušain ja duođášusaiguin pdf-hámis oahppohálddahuš eksámenčujuhussii (eksamen@samas.no). Pdf-fiillaid lassin addojuvvonit sisa vihtta (5) kopierejuvvon ja liibmejuvvon A4-sturrosaš gáhppálaga nákkosgirjjiis dutkanhálddahuš hildui Diehtosiidda ovdakantuvrras.

Čuovvovaš fiillat galget leat mielddusin e-boasttas mii sáddejuvvon oahppohálddahušsii (oahppohálddahuš@samas.no). Fiillaid namat galget leat nugo listtu osiid vuosttaš namahušat leat dás:

Ohcan: Devdon ohcanskovvi (skovvi lea SA ruovttusiiddus).

Miellduš 1 Nákkosgirjji: Nákkosgirjji pdf-hámis Sámi allaskuvlla mearrádušaid ja gáibádušaid mielde, gč. láhkaásahusa § 11-1. (Fuomáš, ahte digitála mildosa lassin addojuvvon nákkosgirjji vihttan (5) gáhppálahkan bábirhámis nugo lea badjelis teavsttas čilgejuvvon).

Miellduš 2 Oahppooasi: Duođáštuš oahppooasi dohkkeheamis. Din go duođáštuš oahppohálddahuš ovdal go ozat. (Oahppooasi gáibádušat leat čilgejuvvon prográmma plánuš.)

Miellduš 3 Lobit: Dárbbášlaš lobiid duođáštušat, nugo immateriála vuoigatvuođaide guoskevaš šiehtadušat. Buot oassebealit galget čállit dakkár duođáštušaid vuollái.

Miellduš 4 Mielčállit: Mielčálličilgehuš dárbbu mielde, gč. láhkaásahusa § 11-1, mas čuožžu: “Artihkalanákkosgirjái galgá bidjat sierra, vuolláičállojuvvon čilgehuš, mii govvida kandidáhta barggu juohke ovttaskas artihkkalis.”

Dutkanhálddahuš dárkkista ahte sisasáddejuvvon ohcamuš deavdá láhkaásahusa § 14-1 gáibádušaid. Ohcamuš ovddiduvvo DOS:i mii nammada nákkosgirjái árvvoštallankomitea (gč. láhkaásahusa kap. 15). Nákkosgirjji sáddejuvvon nammaduvvon árvvoštallankomiteai.

15.2. Árvvoštallankomitea nammadeapmi

Ovdal go doavttirgrádstudeanta ohcá nákkosgirjji árvvoštallamii, de kandidáhtta ja bagadallit sáhttet ságastallat árvvoštallankomitea vejolaš lahtuid birra. Bagadalli sáhtta áinnas váldit oktavuoda vejolaš dutkiiguin, geat devdet láhkaparagráfa § 15-1 nuppi oasi gáibádušaid ja geat sáhtášedje searvat árvvoštallankomiteai. Danin árvvoštallankomitea lahtuid gulaskuddan ja čohkken berre álgit buriin ággiin ovdal go studeanta sádde ohcamuša nákkosgirjji árvvoštallamii.

Go Sámi allaskuvla lea dohkkehan nákkosgirjji árvvoštallanohcamuša, de nammada DOS fágagoađi evttohusa vuodul áššedovdi árvvoštallankomitea nákkosgirjji ja nákkáhallama árvvoštallamii (gč. § 15-1 láhkaásahusa).

Árvvoštallankomiteas leat unnimustá golbma lahtu (gč. láhkaásahusa § 15-1). Komitea galgá ásahit nu ahte

- guktot sohkabealit leat ovddastuvvon
- unnimustá ovtta lahtus ii leat váldovirgi Norgga ásahusa
- eanáš lahtut eai leat Sámi allaskuvlla virggehasat
- buot lahtuin lea doavttirgráda dahje vástideaddji gealbu.

Láhkaásahusa § 15-1 goalmát oasi mielde ferte erenoamážit ákkastallat jus spiehkastit dain eavttuin. DOS nammada komitea jođiheaddjin ovtta komitealahtu dahje eará Sámi allaskuvlla virggehasa (gč. láhkaásahusa § 15-1 vuosttaš oasi). Nammaduvvon bagadallit dahje earát, geat leat leamaš mielde nákkosgirjebarggus, eai sáhte leat árvvoštallankomitea lahttun eaige dasa gustojeaddji hálddašandoaimmain.

Goahti sádde komiteaárvalusa kandidáhttii ovdal go mearriduvvo, ja kandidáhtas lea vejolašvuohta buktit čálalaš kommentáraid vahku (vihitta bargobeavvi) dan beavvi rájes go lea ožžon dieđu.

Kandidáhtta oažžu diehtit geat leat mearriduvvon komiteai go oažžu kopijja e-boasttas mii sáddejuvvo komitea miellahtuide ja sisttisdoallá nákkosgirjji.

Maŋŋil go nákkosgirji lea sisaaddon árvvoštallamii, de ii leat dáhpi ahte studeanta váldá oktavuoda árvvoštallankomitea miellahtuiguin.

15.3. Árvvoštallankomitea cealkámuš

Árvvoštallankomitea galgá gárvet cealkámuša maŋemustá golbma mánu maŋŋel go nákkosgirji lea addojuvvon sisa, jus ásahus ii mearrit eará (gč. láhkaásahusa § 16-3). Dutkan- ja oahppostivra lea mearridan ahte árvvoštallankomiteas lea golbma mánu árvvoštallanáigi. Jus komitea bivdá dievasmahttit nákkosgirjji, de ođđa cealkámuša áigemearri rehkenasto dan beavvi rájes, go nákkosgirji addojuvvo ođđasis árvvoštallamii (gč. láhkaásahusa § 16-3).

Komitea cealkámuš doaimmahuvvo Sámi allaskuvlii mii addá dan doavttirgrádakandidáhttii. Kandidáhttii addo logi (10) bargobeavvi áigemearri buktit čálalaš mearkkašumiid cealkámušii. Jus doavttirgrádakandidáhtas eai leat čálalaš mearkkašumit, de son dieđiha dan dutkanhálddahussii farggamusat. Sámi allaskuvla guorahallá ášši láhkaásahusa § 17-1 mielde.

Cealkámušas bohtet dábálaččat ovdan nákkosgirjji nana bealit, makkár ođđa dutkanbohtosat nákkosgirjjiis leat ja movt dutki lea ovddideame dahje ođasteame iežas fágasuorggi. Cealkámušas galgá maiddái bohtit ovdan komitea kritihkka ja vuosteákkat nákkosgirjái jus dakkárat leat. Dat sáhttet guoskat nákkosgirjji teorehtalaš, metodalaš dahje empirialaš beliide.

Árvvoštallankomitea cealkámušas bohtá maiddái ovdan komitea konklusuvdna. Láhkaásahusa kapihttaliin 16–18 leat čilgejuvvon árvvoštallankomitea cealkámušaid konkluderenvejolašvuodát.

Cealkámuš čuovvu ovtta dán golmma vejolašvuodas:

- 1) Cealkámuš konkludere ahte nákkosgirji lea bealuštan veara nákkáhallamis.
- 2) Komitea ávžžuha ásahusa addit studentii lobi unnit divvumušaide ovdal go komitea

loahpalaččat árvvoštallá nákkosgirjji

- 3) Komitea ii dohkket nákkosgirjji. Dát mearkkaša ahte doavttirgrádastudeanta sáhtta ođđasit sáddet sisa barggu áramustá guhtta (6) mánu maŋnil go DOS lea dahkan mearrádusa.

Árvvoštallankomitea cealkámuša konklusuvdna váikkuha dasa mainna lágiin nákkosgirjji dohkkeheapmi ovdána viidáseappot, ja dat meannudanvuogit čilgejuvvojit čuovvovaš kapihttaliin.

15.3.1. Komitea cealkámuš: Nákkosgirji dohkkehuvvo

Jus árvvoštallankomitea cealká, ahte nákkosgirji dohkkehuvvo ja lea bealuštan veara nákkáhallamis, de dat mearkkaša dan, ahte árvvoštallankomitea dohkkeha nákkosgirjji dan hámis go dat lea sáddejuvvon sisa árvvoštallamii. Láhkaásahusa § 19-2 mielde nákkosgirji almmuhuvvo dasto dan hámis go dat lea addojuvvon árvvoštallamii, iige doavttirgrádastudeanta sáhte šat rievdatišgoahtit nákkosgirjji sisdoalu jus árvvoštallankomitea dohkkeha nákkosgirji viidáseappot almmolaš bealušteapmái.

15.3.2. Komitea ávžžuha dievasmahttit nákkosgirjji ovdal loahpalaš cealkámuša

Árvvoštallankomitea sáhtta láhkaásahusa § 16-2 vuodul ávžžuhit ahte DOS addá studentii lasseáiggi nákkosgirjji dievasmahttimii unna rievdadusaiguin, ovdal go loahpalaš árvvoštallankomitea cealkámuš buktojuvvo. Komitea fertte čálalaččat čilget maid kandidáhtta galgá nákkosgirjji divvut (vrd. láhkaásahusa § 16-2).

DOS mearrida loahpalaččat čuovvugo dat árvvoštallankomitea cealkámuša láhkaásahusa § 16-2 vuodul addit studentii vejolašvuoda sáddet sisa nákkosgirjji rievdaduvvon hámis dábaláččat golmma mánu siste. DOS mearrida dárkilis sisaaddináigemeari. Dát komiteacealkámuš ii lohko refušuvdnan, muhto oassin doavttirgrádastudeantta vuosttaš sisaaddimis.

Studeanta sádde rievdaduvvon nákkosgirjji čujuhussii *eksamen@samas.no*. Ávžžuhuvvo ahte studeanta hábme sullii siidosaš mildosa (*toppnotáhta*) mas čilge rievdadusaid váldočuoggáid, mat leat dahkon komitea álgoávžžuhusaid vuodul. Dutkanhálddahus sádde dievasmahttojuvvon nákkosgirjji komiteai ođđa árvvoštallamii.

Komitea árvvoštallá nákkosgirjji ođđasit ja guorahallá leago kandidáhtta dievasmahttán nákkosgirjji árvvoštallankomitea cealkámuša gáibádusaid mielde. Komitea gárvvista loahpalaš cealkámuša ja sádde dan dutkanhálddahussii.

Go árvvoštallankomitea bivdá dievasmahttit nákkosgirjji, de komitea ođđa cealkámuša golmma mánu cealkináigemearri rehkenasto dan beaivvi rájes, go nákkosgirji addojuvvo ođđasit árvvoštallamii (gč. láhkaásahusa § 16-3).

Jus doavttirgrádastudeanta ii doala mearriduvvon sisaaddináigemeari, de lohko vuosttaš sisaaddin loahpahuvvon, ja dalle lea loahpalaš konklusuvdnan refušuvdna. Nákkosgirji ii sáhte dalle sáddejuvvot sisa ovdal go guhtta (6) mánu lea vássán dan rájes go DOS mearridii addit liigeáiggi kandidáhttii.

Árvvoštallankomitea cealkámuš nuppi čuoggá (2) mielde lea vejolaš dušše fal dalle, go nákkosgirji lea addojuvvon árvvoštallamii vuosttaš háve. Árvvoštallankomitea ii sáhte juolludit nákkosgirji nuppi árvvoštallamis ođđasit lasseáiggi unna rievdadusaide dahje dievasmahttimii, muhto dalle komitea árvvoštallá dušše dan sáhttago nákkosgirji ovddiduvvot viidáseappot bealušteapmái nákkáhállandilálašvuhtii.

15.3.3. Komitea cealkámuš: Nákkosgirji ii dohkkehuvvo

Jus árvvoštallankomitea gávnaha vuosttaš árvvoštallamis, ahte nákkosgirji gáibida vuđolaš nuppástusaid mat gusket teorijai, hypotesaide, dutkanmateriálii dahje -metodii ja mat leat dárbblašat vai barggu sáhtta bealuštit nákkáhállamis, de komitea ii galgga dohkkehit nákkosgirji (gč. láhkaásahusa § 16-2 goalmmát oasi).

Jus nákkosgirji ii dohkkehuvvo, de divojuvvon nákkosgirji čuovvovaš sisaaddináigi sáhtta leat áramusat go lea guhtta (6) mánu gollan DOS-mearrádusa rájes (gč. láhkaásahusa § 18-1). DOS mearrida ođđa dáhtona goas ođđa sisaaddin áramustá sáhtta dahkkot.

Doavttirgrádkandidáhtta galgá ozadettiin nákkosgirji ođđa árvvoštallamii almmuhit ohcanskovis ahte nákkosgirji lea ovdal árvvoštallojuvvon ja ahte dat ii dalle dohkkehuvvon bealušteapmái (gč. § 18-1). Árvvoštallankomitea nammaduvvo de ođđasit. Komitea čohkkehusa dáfus oažžu áinnas leat kontinuehta vuosttaš ja nuppi vuoru árvvoštallankomiteaid gaskkas, muhto jus kandidáhtta sávvá eará komitea, de son ferte dan ákkastallat ja čálalaččat addit dieđu dutkanhálddahussii vai ođđa árvvoštallankomitea nammaduvvo.

Jus nákkosgirji ii nuppi sisaaddimisge dohkkehuvvo bealušteapmái, de ii leat šat vejolašvuhta addit sisa rievdaduvvon veršuvnna árvvoštallamii (gč. láhkaásahusa § 18-1). Komitea kritihkalaš mearkkašumit doibmet bagadallamin studeantta viidáset bargui, vai nákkosgirji sáhtta maŋjit áiggis sisaaddojuvvot. Jus nákkosgirji hilgojuvvo goalmmát (3) čuoggá vuolde, de lea dehálaš ahte studeanta ságastallá vuđolaččat bagadalliin dahje bagadalliiguin plánen dihte mo son galggašii rievdadit dutkamuša vai lea vejolaš boahteáiggis sáddet ođđa nákkosgirji árvvoštallamii.

15.4. Árvvoštallankomitea ovttamielalaš dahje juohkásan cealkámuš

Láhkaásahusa paragrafas 17-1 leat njuolggadusat komitea cealkámušii ja cealkámuša guorahállamii ja dat čilgejuvvojit dás.

15.4.1. Ovttamielalaš cealkámuš

Jus komitea addá ovttamielalaš cealkámuša ja Sámi allaskuvla dohkkeha dan iežas mearrádusa vuodđun, de dahká allaskuvla iežas mearrádusa komitea ovttamielalaš cealkámuša vuodul.

Jus Sámi allaskuvla ákkastallojuvvon ákkaid vuodul eahpida leago komitea ovttajienalaš mearrádus buorre, de ferte DOS dáhttut lagat čilgehusa árvvoštallankomiteas ja/dahje nammadit guokte áššedovdi, geat goappašagat árvvoštallaba nákkosgirji ja addiba das goabbat cealkámuša. Dákkár lassecealkámušat dahje oktagaslaš cealkámušat addojuvvojit diehtun doavttirgrádkandidáhttii, ja sutnje addo vejolašvuhta buktit iežas mearkkašumiid.

Dán maŋŋá DOS ieš mearrida loahpalaččat ášši komitea cealkámuša ja olggobeale cealkámušaid vuodul.

15.4.2. Juohkásan cealkámuša guorahallan

DOS árvvoštallá ja mearrida komitea juohkásan cealkámuša. Jus komitea ovddida juohkásan cealkámuša ja DOS mearrida atnit eanetlogu cealkámuša iežas mearrádusa vuodđun, de dahká Sámi allaskuvla iežas mearrádusa eanetlogu cealkámuša mielde. Jus komitea ovddida juohkásan cealkámuša ja DOS árvvoštallá atnit vuodđun unnitlogu cealkámuša, de sáhtá DOS ráđđádallat komiteain, dahje sáhtá nammadit guokte ođđa áššedovdi guorahallat nákkosgirjji. Dát áššedovdit eaba doaimma komitean, muhto goappašagat árvvoštallaba nákkosgirjji ja ovddideaba goabbatge cealkámuša.

Doavttirgrádkandidáhttii addo vejolašvuohta 10 beaivvi siste buktit iežas čálalaš mearkkašumiid komitea cealkámušii. Jus guktot ođđa áššedovdit leaba ovttamielalaččat álgoálgosaš komitea eanetloguin, de čuvvojuvvo eanetlogu mearrádus.

Doavttirgrádkandidáhttii dieđihuvvo maid DOS mearrida.

15.5. Geahččaladdanlogaldallama ja nákkáhallama áiggit sohppojuvvojit

DOS mearrida árvvoštallankomitea cealkámuša vuodul lea go nákkosgirji bealuštan veara. Jus DOS mearrida lágidity nákkáhallama, de dat nammada nákkáhallanjođiheaddji gii lea láhkaásahusa § 20-2 mielde juogo DOS jođiheaddji dahje son gean DOS fápmuda dasa. Kandidáhtta oázžu dutkanhálddahas dieđu nákkáhallama jođiheaddji birra oktan dieđuiguin nákkosgirjedeaddileami birra.

Dábálaččat dollojuvvo geahččaladdanlogaldallan ja nákkáhallan seammá beaivvi. Fágagoahti sáhtá spiehkastit das dušše jus erenoamáš dilit dan gáibidit. Nákkáhallama jođiheaddji šiehtada kandidáhtain ja árvvoštallankomiteain nákkáhallandáhtona.

Geahččaladdanlogaldallan ja nákkáhallan sáhtá áramusat dollojuvvot guhtta (6) vahku maŋŋil go DOS lea gávnnahan nákkosgirjji dohkálažžan bealušteapmái. Áigi nákkosgirjji sisaaddima rájes gitta nákkáhallamii galgá leat nu oanehaš go vejolaš, dábálaččat eanemustá vihtta (5) mánu.

Dutkanhálddahas nammaduvvo hálddahaslaš oktavuodáolmmoš gii pláne ja bearráigeahččá nákkáhallandilálašvuoda praktihkalaš beliid.

Árvvoštallankomitea addá dieđu dutkanhálddahussii guđemuš komitealahttu váldá vuosttaš ja guđemuš nuppi opponeantta rolla. Árvvoštallankomitea vällje maddái studeantta geahččaladdanlogaldallama fáttá, ja dat dutkanhálddahas almmuha dan doavttirgrádkandidáhttii unnimustá logi (10) bargobeavvi ovdal logaldallama.

16. Nákkosgirji dohkkehuvo almmuheapmái

Sisaaddon nákkosgirji ii sáhte geassit ruovttoluotta ovdal go lea loahpalaččat mearriduvvon lea go nákkosgirji bealuštan veara nákkáhallas. Go nákkosgirji dohkkehuvo, de studeanta oažžu dieđu dutkanhálddahas álggahit nákkosgirji deaddilanbarggu nákkáhallas várás. Nákkosgirji almmuhuvvo dan hámis go dat lea addojuvvon árvvoštallamii. Jus komitea lea bivdán kandidáhta divvut nákkosgirji, de almmustahttojuvo divvojuvvon nákkosgirji.

16.1. Erratalistu: maŋimuš meattáhusaid divvun ovdal go nákkosgirji almmuhuvvo

Nákkosgirji sisaaddima maŋjel ja árvvoštallankomitea cealkámuša maŋjel sáhtta divvut dušše fal nákkosgirji formála boasttuvuođaid ovdal go girji deaddiluvvo. *Erratalistu* lea formála meattáhusaid listu man studeanta sádde dutkanhálddassii ja mas leat konkreta divvunárvalusat formálalaš feaillaide (layout unnibuš meattáhusat, deaddilanfeallat, gielalaš feallat jna.). Erratalistu ii galgga leat guhki, ja dan lea vejolaš addit sisa dušše oktii. Formálalaš feallaid divvun mearkkaša dahkat teavstta gielalaččat riekta, muhto dán muttus ii leat šat vejolašvuohta čilget, buoridit dahje dahkat rievdadusaid teavstta sisdollui. Dás lea maid dehálaš fuomášit ahte erratalistu ii leat olles nákkosgirji giellabassan, muhto dušše fal maŋimuš meattáhusaid divvun. Oppalaš giellabassan ja govaid, tabeallaid ja eará materiálad ordnen ja hábmen nákkosgirjái galgá leat dahkon ovdal go studeanta sádde nákkosgirji árvvoštallamii (vrd. kap. 2 dán gihppagis).

Erratalisttu áigemearri sáddet dutkanhálddassii lea guhka vahku ovdal plánejuvvon nákkáhallas. Ávžuhit ahte studeanta dárkkistišgohtá sisasáddejuvvon ja vejolaččat dievasmahttojuvvon nákkosgirji giehtačállosa juo dan botta go árvvoštallankomitea lea bargame cealkámušainis. Ná erratalistu sáhtta gárvánit dakka manjel go árvvoštallankomitea dohkkeha nákkosgirji deaddileapmái ja almmolaš bealušteapmái.

Jus DOS-jođiheaddji dohkkeha erratalisttu, de kandidáhta oažžu divvut daid feallaid nákkosgirji giehtačállosii ja de sáddet ođđa nákkosgirji fiilla farggamusat sisa dutkanhálddassii. Dát ođđa fiilla lohko de nákkosgirji loahpalaš veršuvdnan, mii prentejuvvo nákkáhallasii.

Jus árvvoštallamii addojuvvon nákkosgirjeveršuvnnas čuožžu ahte okta artihkal “lea almmuhuvvome”, de ii leat vejolaš dan divvut ja čállit ahte artihkal “lea almmuhuvvon”. Tabeallain ii oáččo divvut maidege. Mearráduš, ahte ii leat lohpi rievdadit čállosa sisdoalu, miellidubbuktá maddái ahte kandidáhta ii sáhte divvut artihkkala vaikko áigečála, mii áigu almmuhit artihkkala, livččii bivdán kandidáhta divvut dahje rievdadit osiid teavsttas. Jus kandidáhta olle, de sáhtta ovdasánis čujuhit loahpalaš áigečálaartihkkalii.

16.2. Nákkosgirji deaddileapmi

Sámi allaskuvla fállá almmuhit nákkosgirjiid Sámi allaskuvlla doavttirgrádaráiddus. Kandidáhta sáhtta viežžat prentenskovi Sámi allaskuvlla ruovttusiiddus, deavdit dan ja sáddet dan oktan bearbma- ja siskkošfiillaiguin dutkanráđdeaddái, gii ordne prentenskovvá dutkanhoavdda vuolláičállosa ja ISBN-nummára ja eará dieđuid siskkošfiilla kolofonsiidui.

Prentenskovvi galgá sáddejuvvot dutkanhálddassii maŋimustá vihtta vahku ovdal nákkáhallas, vai dutkanhoavda olle dohkkehit nákkosgirji giehtačállosa ja prentehus olle

prentet girjji ovdal nákkáhallama. Dutkanhálddahus máhcaha skovi kandidáhttii gii álgá ovttasbargat prentehusain. Go oažžu vuolláičállon prentenskovi ruovttoluotta hálddahusas, de dainna sáhtta dingot nákkosgirjjiid prentehusas. Girji galgá leat leverjuvvon Sámi allaskuvlla girjerádjosisi mañimustá guokte vahku ovdal nákkáhallama daningo lánkaásahusa § 19-2 mielde nákkosgirji galgá leat almmolaš unnimustá guokte (2) vahku ovdal nákkáhallandilálašvuoda.

Nákkosgirji prentejuvvo guovtti fiilla vuodul: bearbmafiilla ja siskkošfiilla vuodul. Sámi allaskuvla atná standardiserejuvvon bearpmaid (ovdasiidu ja mañjesiidu), man designii kandidáhtta ii sáhte váikkuhit. Bearbmafiilla čuovvu oktasaš mála man sáhtta viežžat Sámi allaskuvlla ruovttusiiddus ja dan oažžu mañjil go nákkosgirjji árvvoštallanohcamuš lea hálddahuslaš dohkkehuvvon (ja manjel go vejolaš erratalisttu divvumušat leat dohkkehuvvon). Kandidáhtta sáhtta čállit čoahkkáigeasu bearpma mañjesiidui (eanemustá 1200 mearkka oktan gaskaiguin) ja buktit kandidáhttagova (jpg/tiff/png/psd) mañjesiidui. Kandidáhtta ieš árvvoštallá atnágo gova bearpma mañjesiiddus vai ii.

Fiillat galget sáddejuvvot prentehussii guoktin pdf-fiilan. Fiillat galget hábmejuvvot A4-sturrodagas ja leat gárvvisin guovttisiidosaš prentemii. Jearaldagat deaddileami birra sáddejuvvojit dutkanhálddahussii.

Jus nákkosgirjji govain, kárttain dahje govosiin lea vel juoga ordnet prentenkvalitehta dáfus, de sáhtta kandidáhtta oastit prentehusa hábmejeaddjis veahki hábmet kárttaid ja eará dárbbalaš govosiid hálbbiduvvon haddái 350 ruvno diimmus (plus moms), ja dasa sáhtta atnit iežas annuma dahje [ohcat NSI-doarjaga](#), jus studeanta lea Sámi allaskuvlla virggis. Sámi allaskuvla vállje dán bálvalusa hábmejeaddji kandidáhttii ja máksá loahpa (bajábealde 350 ruvno). Vai nákkosgirjji prentemuttus ii dárbbáš šat ordnet govva- ja kártamateriála ded., de ávžžuhit ahte studeanta fuolaha juo ovdal go sádde nákkosgirjji árvvoštallamii, ahte buot materiálain lea dákkár kvalitehta mii dohkke prentemii maiddá.

Sámi allaskuvla gokčá nákkosgirjji 70 gáhppálaga deaddileami. Dán 70 gáhppálagas addojuvvojit Sámi allaskuvlla girjerádjosisi 12 gáhppálaga, main čieža (7) girjji sáddejuvvojit Nátionála girjerádjosisi, ja kandidáhttii addojit 10 nákkosgirjji. Jus studeanta háliida dingot liigegáhppálagaid nákkosgirjjis iežas atnui, de son sáhtta dingot daid mávssu ovddas prentehusas.

16.3. Nákkosgirjji almmuheapmi girjin ja digitála hámis Bibsys Brages

Lánkaásahusa § 19-2 mielde nákkosgirji galgá leat almmolaš mañimustá guokte (2) vahku ovdal dan almmolaš bealušteami (nákkáhallandilálašvuoda), ja danin bealli 48 gáhppálagas maid Sámi allaskuvla deaddila, biddjojit juohkinláhkai guokte vahku ovdal nákkáhallama ja nubbi bealli (24 gáhppálaga) biddjojit juohkinláhkai nákkáhallansáale olggobeallái dan beaivvi go nákkáhallandilálašvuoda lea.

Mañimustá guokte vahku ovdal nákkáhallandilálašvuoda rahppo maiddá liñka nákkosgirjji digitála veršuvdnii.

Sámi allaskuvlla girjerájus ja/dahje dutkanhálddahus sáhtta veahkehit doavttirgrádstudeantta almmuhit nákkosgirjji maiddá rabas neahtas Bibsys Brages. Nákkosgirji oažžu ná bastevas neahttačujuhusa, man sáhtta atnit ee. nákkáhalli boahtteáiggi almmuhemiin ja diehtojuohkimiin. Sámi allaskuvlla ruovttusiidui biddjo maid njuolggolijka nákkosgirjái, vai nákkosgirji lea lohkan lánkai juo ovdal nákkáhallama.

Láhkaásahusa § 19-2 mielde nákkosgirji galgá leat almmolaš unnimustá guokte (2) vahku ovdal dan almmolaš bealušteami (nákkáhallandilálašvuoda), de maiddá i nákkosgirjji digitála liŋka rahppojuvvo unnimustá guokte vahku ovdal nákkáhallama.

17. Nákkáhallandilálašvuhtii ráhkkaneapmi

17.1. Geahččaladdanlogaldallan

Árvvoštallankomitea buktá geahččaladdanlogaldallama bajilčállaga. Geahččaladdanlogaldallama ulbmilin lea iskat sihke kandidáhta návcca guorahallat fáttá mas ii leat njuolgo oktavuoha nákkosgirjái, ja návcca gaskkustit dieđuid logaldallandilálašvuodas. Geahččaladdanlogaldallama fáddá almmuhuvvo doavttirgrádkandidáhttii unnimustá logi (10) bargobeavvi ovdal logaldallama. Komitea jođiheaddji sádde dieđu dán birra hálddahussii, mii sádde viidáseappot kandidáhttii.

Árvvoštallankomitea formálalaš nammadeami rájes gitta geahččaladdanlogaldallama ja nákkáhallama rádjái ii berre leat oktavuoha gaskal kandidáhta ja árvvoštallankomitea miellahtuid. Kandidáhtta sáhhtá vejolaččat digaštallat komitea cealkámuša ja dan dulkoma bagadalliiguin. Lea kandidáhta iežas bargu dulkot geahččaladdanlogaldallama fáttá ja välljet iežas lahkoneami addojuvvon bajilčállaga dulkonvejolašvuodaid vuodul. Kandidáhtta sáhhtá spiehkastahkan, jus lea erenoamáš eahpesihkar logaldallama fáttás, jearrat komitea jođiheaddjis lea go mihkke erenoamážiid maid komitea háliida ságaškušojuvvot. Kandidáhtta ii galgga geahččaladdanlogaldallamis atnit áiggi ovdanbuktit nákkosgirjji bohtosiid. Nákkáhallama álggus lea dasa várrejuvvon áigi (gč. lánkaásahusa § 20-2).

Geahččaladdanlogaldallan lea 45 minuhta. Kandidáhtta sáhhtá atnit logaldallamis audiovisuála veahkkeneavvuid (omd. Powerpoint-čájáhusa).

Maŋŋil geahččaladdanlogallama árvvoštallankomitea doallá čoahkkima mas mearrida dohkkehuvvogo geahččaladdanlogaldallan vai ii.

Sámi allaskuvla sáhhtá šiehttat kandidáhtain ahte streamejuvvogo geahččaladdanlogaldallan ja nákkáhallan. Suinna šiehttojuvvo maidái galgágo streama báddejuvvot ja vurkejuvvot Sámi allaskuvlla arkiivii.

17.2. Nákkáhallan

Nákkáhallama lágida hálddahuslaččat dutkanhálddahus. Go lea mearriduvvon ahte šaddá nákkáhallan, de välljejuvvo hálddahuslaš koordináhtor hálddahusas gii pláne ja ordne nákkáhallanlágideami praktihkalaš beliid. Kandidáhtta maid oažžu dieđu go hálddahuslaš koordináhtor lea nammaduvvon. Nákkáhallan lea allaárvosaš dilálašvuoha, ja nákkáhallama jođiheaddji, opponeanttat ja kandidáhtta leat čáppat gárvodan, ja nákkáhallansáles lea maidái nákkáhallandilálašvuhtii sohppojuvvon činheapmi.

Nákkáhallama jođiha dábálaččat DOS-jođiheaddji dahje son gean DOS fápmuda dasa (gč. lánkaásahusa § 20-2). Nákkáhallandilálašvuoha álgá prosešuvnnain, mas nákkáhallama jođiheaddji láide prosešuvnna nákkáhallanlatnjii. Su čuvvot doavttirgrádstudeanta (nákkáhalli), vuosttaš opponeanta, nubbi opponeanta ja goalmmát opponeanta, gii lea maid komitea jođiheaddji.

Vurdojuvvo ahte guldaleaddjit leat juo sáles ja sii čuožžilit go prosešuvdna bohtá sisa. Go prosešuvdna lea bohtán sálii, de čohkkedit doavttirgrádstudeanta ja komitealahtut sidjiide várrejuvvon sajiide.

Nákkáhallama jođiheaddji doallá álggahansártni mas son čilge oppalaččat gii nákkáhallá, nákkosgirjji fáttá ja geahččaladdanlogaldallama sisaaddima ja árvvoštallama. Dan maŋŋel doavttirgrádstudeanta doallá sárdnestuolus 15 minuhta guhkkosaš sáhkavuoru iežas

dutkanbarggu ulbmila, dutkanmateriála, teorehtalaš lahkonanvugiid ja dutkanbohtosiid birra. Sáhavuoru ulbmilin lea čilget nákkosgirjji guovddáš beliid guldaleddjiide, ja nákkáhalli sáhtta atnit audiovisuála veahkkeneavvuid (omd. Powerpoint-čájáhusa). Jus ovdamearkka dihte PowerPoint adnojuvvo sáhavuorus, de dat rahppo gárvvisin čájeheapmái ovdal go nákkáhallandilálašvuotta álgá, ja álggahansiidui biddjojit dieđut nákkosgirjji ja nákkáhalli birra.

Nákkáhalli sáhavuoru maŋŋel nákkáhallaságastallama jodiheaddji bovde doavttirgrádstudeantta ja vuosttaš opponeantta ovddabeallái nákkáhallas (omd. lávddi ala). Opponeanta ja doavttirgrádstudeanta čohkkába ságastallama áigge nu ahte soai oaidniba nubbi nuppi bures, muhto sudno ámadajut galget maiddái leat oidnosis guldaleddjiide.

Vuosttaš opponeanta álggaha nákkáhallaságastallama. Sámi allaskuvla lea addán rávvejeaddji áiggi vuosttaš opponeantta ságastallamii gitta beannot (1,5) diimmu rádjai. Nubbi opponeanta loahpaha nákkáhallas, ja dán ságastallama rávvejeaddji guhkodat lea gitta ovttá (1) diimmu rádjái. Mii guoská opponeanttaid kommentáraid sisdollui, de leaba soai ovddalgihtii šiehttan gaskkaneaskka goabbá váldá bajás maid nákkáhallas. Komiteacealkámuš sáhtta maid čujuhit relevánta temáide mat nákkáhallas sáhttet boahtit bajás.

Vuosttaš opponeanta sáhavuoru maŋŋel dollojuvvo boddu. Eará guldaleaddjit geat háliidit opponeret *ex auditorio* galget bottu áigge addit dieđu dán birra nákkáhallas jodiheaddjai. Nákkáhallasjodiheaddji almmuha dán nákkáhallas álgosáhavuorustis. *Ex auditorio* -opponeren lea nákkáhallasjodiheaddji loahpas.

Go opponeanttat ja vejolaš *ex auditorio* -opponanttat leat geargan de nákkáhallasjodiheaddji loahpaha nákkáhallasjodiheaddji.

Láhkaásahusa § 20-2 mielde nákkáhallasjodiheaddji maŋŋá addá árvvoštallankomitea ásahussii čilgehusa, mo dat lea árvvoštallan nákkosgirjji bealušteami. Čilgehusa lea konklusuvdna das leago nákkáhallas dohkkehuvvon vai ii. Opponeanttaid oainnut deattuhuvvojit árvvoštallamis. Čilgehusa ferte vuodustit jus nákkáhallas ii dohkkehuvvo.

Láhkaásahusa §21-1 čuožžu ahte jus Sámi allaskuvla ii dohkket nákkáhallas, de sáhtta doavttirgrádkandidáhtta bealuštit nákkosgirjji ođđasis. Ođđa nákkáhallas sáhtta doallat áramustá guhtta mánu maŋŋá, ja nu guhkás go vejolaš, berre álgoálgosaš árvvoštallankomitea árvvoštallat dan, jus Sámi allaskuvla ii mearrit eará.

18. Eará geavatláš dieđut

18.1. Preassadieđáhus ovdal nákkáhallandilálašvuoda

Go lea sohppojuvvon goas geahččaladdanlogaldallan ja nákkosdilálašvuota dollojuvvojit, de kandidáhtta deavdá preassadieđáhuskovi mii lea Sámi allaskuvlla ruovttusiiddus. Son sádde skovi Sámi allaskuvlla diehtujuhkinkonsulentii, gii ráhkada kandidáhta vehkiin preassadieđáhusa nákkáhallandilálašvuoda birra. Diehtujuhkinkonsuleanta sáhtta váldit gova kandidáhtas. Jus nákkosgirjji bearpma maŋgesiiddus lea nákkáhalli govva, de dát seamma gova sáhtta adnojuvvot maiddái preassadieđáhusas.

Nákkáhallama preassadieđáhusas almmuhuvvo maiddái liŋka Sámi allaskuvlla nákkáhallansiidui, ja dan siidui lasihuvvo dađistaga maiddái nákkosgirjji liŋka.

18.2. Nákkáhallanbeaivvi lunša, gáfestallan ja doavttirdoalut dahje -mállásat

Geahččaladdanlogaldallama maŋŋil lágiduvvo lunša. Fágagohti bovde nákkáhallanjođiheaddji, árvvoštallankomitea, bagadalliid, doavttirgrádstudeantta ja vejolaččat su lagamus bearraša lunšii ja ášahusas rektora ja prográmmajođiheaddji.

Nákkáhallandilálašvuoda maŋŋel lea gáfestallan.

Doavttirdoalut dahje doavttirmállásat lea eahketdoalut, maid nákkáhalli sáhtta lágideit jus háliida. Dát mállásat eai leat bákkolaččat, muhto dát lea vuogas vuohki loahpahit nákkáhallanbeaivvi allaárvosaš doaluid. Dákkár doavttirmállásat leat šaddan unnit formálalaččat maŋimuš jagiid áigge. Čuovvovaš vugiid doalahit dábálaččat doavttirmállásiin: Nákkáhallama jođiheaddji berre bovdejuvvot oktan árvvoštallankomiteain, ja maiddái bagadallit leat doavttirmállásiid bovdejuvvon guossit. Nákkáhalli sáhtta bovdeit maiddái iežas fágalaš kollegaid ja bearraša.

Nákkáhallama jođiheaddji doallá dábálaččat vuosttaš sártni. Dan maŋŋel bohtá goalmát opponeanta (komitea jođiheaddji) gii doallá sártni mállásiid maŋŋel. Jus goahtejođiheaddji (ja jus son ii leat nákkáhallama jođiheaddji) searvá mállásiidda, de son sáhtta doallat sártni goalmát opponeantta maŋŋel. Bagadalliid sárdnevuorru lea goahtejođiheaddji maŋŋá. Jus leat eará sártnit, de daid ortnet lea friddja.

18.3. Nákkáhallamii gullevaž goluid eretgeassin vearrodieđáhusas

Norgga vearroetáhta addá kandidáhttii rievtti geassit eret goluid mat leat čuožžilan nákkosgirjji deaddileami, mátkkošteami ja doavttirgrádamállásiid oktavuodas. Dán birra sáhtta eanet lohkat Vearroetáhta neahttasiidduin: <https://www.skatteetaten.no/person/skatt/hjelp-til-riktig-skatt/arbeid-trygd-og-pensjon/utdanning/fradrag-for-kostnader-til-doktorgrad/>.